

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 43/3

ք.Երևան

16 սեպտեմբերի 2022թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով շրջանառության հարկ վճարող համարվելու վերաբերյալ «ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ-ի (ՀՎՀՀ՝ 2869366) դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

«ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ-ի ներկայացուցիչ Գայանե Աբրահամյանի (այսուհետ նաև՝ բողոքաբեր) դիմում-բողոքում մասնավորապես նշված է, որ «ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ ընկերությունը մտադիր է զբաղվել իրավաբանական ծառայությունների մատուցմամբ: 2022թ-ի օգոստոսի 12-ին «ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ ընկերության հետ «Աբրահամյան և գործընկերներ» ՍՊԸ ընկերությունը կնքել է հաշվապահական ծառայությունների մատուցման պայմանագիր: «ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ ընկերության հիմնադիր-տնօրենը հանդիսանում է Ռուսաստանի Դաշնության քաղաքացի, որը ՀՀ ԱՆ իրավաբանական անձանց պետական ռեգիստրում գրանցվելուց հետո մեկնել է Հայաստանի Հանրապետությունից և հարկային մարմնում համապատասխան գրանցումներ չի կատարվել, մասնավորապես չի գրանցվել առցանց լիազոր, օգտվող, ինչպես նաև բաց է թողնվել շրջանառության հարկ վճարող համարվելու վերաբերյալ հայտարարություն ներկայացնելու ժամկետը: Բողոքաբերը նշում է, որ «ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ ընկերությունը դեռ չի սկսել իր գործունեությունը:

Վերոնշվածը հաշվի առնելով, բողոքաբերը խնդրում է հնարավորություն տալ հանձնել շրջանառության հարկ վճարող համարվելու վերաբերյալ հայտարարությունը:

2. Դիմում-բողոքի քննության համար էական նշանակություն ունեցող փաստերը

«ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ-ն ՀՀ ԱՆ իրավաբանական անձանց պետական ռեգիստրում պետական գրանցում է ստացել 12.07.2022թ.-ին (գրանցման համար՝ 273.110.1251726):

«ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊԸ-ն սահմանված ժամկետում չի ներկայացրել շրջանառության հարկ վճարող համարվելու վերաբերյալ հայտարարությունը, որի հետևանքով ավտոմատ կերպով համարվել է ավելացված արժեքի հարկ վճարող:

Համաձայն ՀՀ ԱՆ իրավաբանական անձանց պետական ռեգիստրի 06.09.2022թ. թիվ /25.6/39377-2022 գրության՝ 12.07.2022թ.-ին «ՄԵՆՎԻՆ ԲԻՋՆԵՍ ԿՈՆՍՈԼԻԴԱՆՏ» ՍՊ ընկերությունը գործակալությունում գրանցվելիս Հայաստանի Հանրապետության հարկային օրենսգրքով սահմանված և հարկային մարմնի կողմից հաստատված ձևով հայտարարություն՝ ավելացված արժեքի հարկ վճարող համարվելու և որպես ավելացված արժեքի հարկ վճարող հաշվառվելու, շրջանառության հարկ վճարող, ինչպես նաև միկրոձեռնարկատիրության սուբյեկտ համարվելու վերաբերյալ հայտարարություններ չի ներկայացրել, իսկ գրանցման դիմումի մեջ ԱԱՀ վճարող համարվելու վերաբերյալ նշում է կատարել «ոչ» դաշտում:

3. Բողոքարկման առարկային վերաբերվող իրավական կարգավորումներ և եզրահանգումներ

ՀՀ հարկային օրենսգրքի 254-րդ հոդվածի 1-ին մասի 2-րդ կետին համապատասխան՝ շրջանառության հարկ վճարողներ են համարվում սույն հոդվածի 2-րդ մասով սահմանված պայմանը բավարարող ռեզիդենտ առևտրային կազմակերպությունները, անհատ ձեռնարկատերերը և նոտարները (բացառությամբ սույն հոդվածի 3-րդ մասով սահմանված դեպքերի) հետևյալ դեպքերում և ժամկետներում, մասնավորապես հարկային տարվա ընթացքում պետական գրանցում ստացած առևտրային կազմակերպությունը կամ որպես անհատ ձեռնարկատեր հաշվառված կամ որպես նոտար նշանակված ֆիզիկական անձը՝ համապատասխանաբար, որպես կազմակերպություն պետական գրանցման կամ որպես անհատ ձեռնարկատեր հաշվառման կամ որպես նոտար նշանակման օրվանից մինչև տվյալ հարկային տարվա ավարտը (բացառությամբ Օրենսգրքի 59-րդ հոդվածով սահմանված՝ հարկային տարվա ընթացքում ԱԱՀ վճարող համարվելու դեպքի), եթե հարկ վճարողը մինչև համապատասխանաբար՝ որպես կազմակերպություն պետական գրանցման կամ որպես անհատ ձեռնարկատեր հաշվառման կամ որպես նոտար նշանակման օրվան հաջորդող 20-րդ օրը ներառյալ հարկային մարմին է ներկայացրել հարկային մարմնի հաստատած ձևով հայտարարություն՝ շրջանառության հարկ վճարող համարվելու վերաբերյալ: Սույն կետի կիրառության իմաստով՝ վերակազմակերպման արդյունքում նոր ստեղծվող կազմակերպության կամ կազմակերպությունների (բացառությամբ միացման ձևով վերակազմակերպման դեպքում այն կազմակերպության, որին միանում են այլ կազմակերպություն կամ կազմակերպություններ և առանձնացման ձևով վերակազմակերպման դեպքում այն կազմակերպության, որից առանձնանում են այլ կազմակերպություն կամ կազմակերպություններ) համար պետական գրանցում է համարվում նաև կազմակերպությունների վերակազմակերպման պետական գրանցումը:

«Իրավաբանական անձանց պետական գրանցման, իրավաբանական անձանց առանձնացված ստորաբաժանումների, հիմնարկների և անհատ ձեռնարկատերերի պետական հաշվառման մասին» ՀՀ օրենքի 35-րդ հոդվածի 12-րդ կետի համաձայն՝ Իրավաբանական անձանց գործակալությունը տրամադրում է նաև հարկային մարմնի սահմանած ձևով ծանուցում (այդ թվում՝ սույն հոդվածի 8-րդ մասով սահմանված կարգով)՝ Հայաստանի Հանրապետության հարկային օրենսգրքով սահմանված հարկային համակարգերի ու դրանց ընտրության

նպատակով հայտարարություններ ներկայացնելու ժամկետների վերաբերյալ: Իրավաբանական անձինք Հայաստանի Հանրապետության հարկային օրենսգրքով սահմանված՝ ավելացված արժեքի հարկ վճարող համարվելու և որպես ավելացված արժեքի հարկ վճարող հաշվառվելու, շրջանառության հարկ վճարող, ինչպես նաև ընտանեկան ձեռնարկատիրության սուբյեկտ համարվելու վերաբերյալ հայտարարությունները կարող են ներկայացնել գործակալության միջոցով:

Ելնելով վերոնշյալ իրավակարգավորումներից, ուսումնասիրելով սույն գործի քննության համար էական նշանակություն ունեցող փաստերը և հաշվի առնելով ՀՀ ԱՆ իրավաբանական անձանց պետական ռեգիստրի 06.09.2022թ. թիվ /25.6/39377-2022 գրությունը Հանձնաժողովը գտնում է, որ անհրաժեշտ է հնարավորություն ընձեռել «ՄԵՆՎԻՆ ԲԻԶՆԵՍ ԿՈՆՍՈԼԻԴԱՆՏ» ՍՊԸ-ին ներկայացնելու հայտարարություն՝ 2022թ.-ի ընթացքում շրջանառության հարկ վճարող համարվելու վերաբերյալ:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը

ՈՐՈՇՈՒՄ Է՝

1. Շրջանառության հարկ վճարող համարվելու վերաբերյալ «ՄԵՆՎԻՆ ԲԻԶՆԵՍ ԿՈՆՍՈԼԻԴԱՆՏ» ՍՊԸ-ի դիմում-բողոքը բավարարել:

2. «ՄԵՆՎԻՆ ԲԻԶՆԵՍ ԿՈՆՍՈԼԻԴԱՆՏ» ՍՊԸ-ի կողմից շրջանառության հարկ վճարող համարվելու վերաբերյալ հայտարարություն ներկայացվելու դեպքում 2022թ.-ին համարել շրջանառության հարկ վճարող:

Սույն որոշումն ուժի մեջ է մտնում իրազեկելուն հաջորդող օրվանից:



Revoked certificate

X

ԱՐՏՅՈՒ ՍՄԲԱՏՅԱՆ

ՀԱՆՁՆԱԺՈՂՈՎԻ ՆԱԽԱԳԱՀ՝

Signed by: SMBATYAN ARTYOM 3210860416

ԱՐՏՅՈՒ ՍՄԲԱՏՅԱՆ